

გახსენება

მერი ცინცაძე



ქალბატონი მერი ცინცაძე 60 წელზე მეტი ხნის განმავლობაში მოღვაწეობდა ბათუმის შოთა რუსთაველის სახელმწიფო უნივერსიტეტში და ერთგულად ემსახურებოდა ახალგაზრდობის აღზრდას. ღვაწლმოსილმა პედაგოგმა შემოქმედებითი ძიების გრძელი და ძნელი გზა გაიარა, აღსანიშნავია მისი სამეცნი-

ერო მოღვაწეობა, ნაყოფიერი საველე შემკრებლობითი მუშაობა. მერი ცინცაძემ დიდი წვლილი დასდო ბსუ-ში ენათმეცნიერების მიმართულების განვითარებას. მკვლევართა შორის პირველმა ისაუბრა კლარჯული კილოს შესახებ, სამეცნიერო მიმოქცევაში შემოიტანა ქართული ენათმეცნიერებისათვის უცხო დიალექტის მასალები.

1950-იანი წლებიდან ქალბატონი მერი თანამშრომლობდა საქართველოს მეცნიერებათა აკადემიის ახლადგახსნილ ბათუმის სამეცნიერო-კვლევით ინსტიტუტთან, მონაწილეობდა საველე ექსპედიციებში. მის მიერ ჩანერილი დიალექტოლოგიური ტექსტები სანდო წყაროა აჭარული დიალექტის საკვლევად. პარალელურად მერი ცინცაძე მუშაობდა ბათუმის შოთა რუსთაველის სახელობის პედაგოგიურ ინსტიტუტში, 1994 წლიდან გახლდათ „ისტორიულ-ფილოლოგიური კვლევის ლაბორატორიის“ ერთ-

ერთი აქტიური წევრი, 1995 წლიდან არაერთ კომპლექსურ ექსპედიციაში მონაწილეობდა. მკვლევარმა კოლეგებთან ერთად შემოიარა ტაო, შავშეთი და კლარჯეთი. მის სამეცნიერო ინტერესებში შედიოდა ქართული ენის სამხრული კილოები (აჭარული, შავშური, კლარჯული, ტაოური, მუჰაჯირთა შთამომავლების მეტყველება), ძველი ქართული ენა, სამწერლობო ქართულისა და სამხრული კილოების მიმართების საკითხები, ქართული სალიტერატურო ენის პრობლემები... იგი არის თანაავტორი რამდენიმე მონოგრაფიისა: „სამხრული კილოები და ქართული სამწერლობო ენა“ (1998), „შავშეთი“ (2011), „კლარჯეთი“ (2016), „ტაო“ (2020). 2013 წელს გამოიცა მისი წიგნი „ქართულად ხსნილად უბნობდი!“, რომელიც ქართული სალიტერატურო ენის ნორმების დაცვას ეძღვნება.

ქალბატონი მერი სიცოცხლის ბოლომდე მუშაობდა იოანე სინელის „კლემაქსის“ (სათნოების კიბე) ქართულ თარგმანებზე; ფიქრობდა, ძველი გამოეცა ყველა რედაქციის მიხედვით, გამოკვლევითა და ლექსიკონით, რაც განუხორციელებელი დარჩა. ღირსეულ მკვლევარს ბევრი რამ დარჩა სათქმელი, დასაწერი, საკვლევი, საძიებელი. თანაავტორებთან ერთად ფიქრობდა „შავშური კილოს“, „კლარჯული კილოსა“ და „ტაოური დიალექტის“ ცალკე წიგნებად გამოცემას. სამწუხაროდ, არ დასცალდა... ერთად დანყებულ საქმეს მისი მოწაფეები განაგრძობენ.